



**Cofnodion wedi'i gadarnhau o gyfarfod y  
Pwyllgor Datblygu Sefydliadol a Phobl  
21 Ebrill 2021, 09:30  
Trwy gyswllt Microsoft Teams**

|                                            |       |                                                                                          |
|--------------------------------------------|-------|------------------------------------------------------------------------------------------|
| <b>Yn bresennol:</b>                       |       |                                                                                          |
| Mohammed Mehmet                            | (MM)  | Cyfarwyddwr Anweithredol a Chadeirydd y Pwyllgor                                         |
| Judi Rhys                                  | (JR)  | Cyfarwyddwr Anweithredol                                                                 |
| Dyfed Edwards                              | (DE)  | Cyfarwyddwr Anweithredol, a Chadeirydd y Pwyllgor Archwilio a Llywodraethu Corfforaethol |
| <b>Hefyd yn Bresennol:</b>                 |       |                                                                                          |
| Rhiannon Beaumont-Wood (gadawodd am 10:00) | (RBW) | Cyfarwyddwr Gweithredol Ansawdd, Nyrsio a Gweithwyr Proffesiynol Perthynol i Iechyd      |
| Helen Bushell                              | (HB)  | Ysgrifennydd y Bwrdd a Phennaeth Uned Fusnes y Bwrdd                                     |
| Neil Lewis                                 | (NL)  | Cyfarwyddwr Dros Dro Datblygu Sefydliadol a Phobl                                        |
| Sarah Morgan (ar gyfer eitem 03.3/2021)    | (SM)  | Rheolwr Amrywiaeth a Chynhwysiant                                                        |
| Stephanie Wilkins                          | (SW)  | Cynrychiolydd Fforwm Partneriaeth Staff                                                  |
| <b>Ysgrifenyddiaeth</b>                    |       |                                                                                          |
| Julie Robinson                             | (JR)  | Swyddog Cymorth y Bwrdd                                                                  |
| <b>Ymddiheuriadau:</b>                     |       |                                                                                          |
| Liz Blayney                                | (LB)  | Rheolwr Llywodraethu'r Bwrdd                                                             |

*Dechreuodd y cyfarfod am 09.30*

|                                                                                                                                                                                                                                                                                                   |                            |
|---------------------------------------------------------------------------------------------------------------------------------------------------------------------------------------------------------------------------------------------------------------------------------------------------|----------------------------|
| <b>PODC 01/2021</b>                                                                                                                                                                                                                                                                               | <b>Materion Cychwynnol</b> |
| Agorodd MM y cyfarfod drwy groesawu pawb a oedd yn bresennol i gyfarfod y Pwyllgor Datblygu Sefydliadol a Phobl oedd yn ail-ymgynnull am y tro cyntaf, gan nodi fod yr ymateb parhaus i COVID-19, a'r Canllawiau Cenedlaethol cyfredol yn golygu bod y cyfarfodydd yn cael eu cynnal yn ddigidol. |                            |

**Nododd** y Pwyllgor fod y cyfarfod yn cael ei recordio i helpu â'r gwaith o greu cofnodion cywir, ac y byddai'r recordiad yn cael ei ddileu ar ôl cytuno ar y cofnodion yn y cyfarfod nesaf.

**Nododd** y Pwyllgor yr ymddiheuriadau am absenoldeb.

#### **PODC 02/2021 Datgan buddiannau**

Ni ddatganwyd unrhyw fuddiannau yn ychwanegol at y rhai sydd eisoes wedi eu cynnwys ar y Gofrestr Datgan Buddiannau.

#### **PODC 03/2021 Eitemau er Sicrwydd**

##### **PODC 03.1/2021 Diweddariad ar y gweithlu – Gwydnwch, Llesiant a Recriwtio**

**Derbyniodd** y Pwyllgor (cyf 3.1.PODC.21042021).

Rhoddodd NL gyflwyniad byr ar ffocws y papur; llesiant staff, ymgysylltu, recriwtio a gwydnwch, cyn i RBW roi diweddariad cynhwysfawr ar y rhaglen brechu staff fel a ganlyn: -

- Ar hyn o bryd roedd 1,708 (76%) o weithwyr wedi cael eu dos cyntaf ac roedd 992 (44%) o weithwyr bellach wedi'u brechu'n llawn. O ran gweithwyr rheng flaen yn benodol, roedd 868 (90%) wedi cael eu dos cyntaf a 778 (81%) wedi'u brechu'n llawn;
- Roedd canran uwch o staff wedi'u brechu trwy'r canolfannau brechu torfol. Roedd Iechyd Cyhoeddus Cymru hefyd wedi cyflwyno brechlyn AstraZeneca drwy raglen frechu fewnol.

Ystyriodd y Pwyllgor:

- Y targed o 100% ar gyfer brechu staff a pham bod y targed ar gyfer y brechlyn hwn yn uwch nag ar gyfer brechiadau eraill megis y fflw (65%)
- Roedd 90% o'r staff wedi'u brechu ac roedd hyn yn ymateb da iawn
- Nodwyd bod gwaith pellach yn mynd rhagddo i ddeall pam nad oedd rhai unigolion yn dewis cael y brechlyn. Cynigiodd SW gysylltu â'r Undebau Llafur i gefnogi hyn
- Yn dilyn sgwrs y nyrs arweiniol â rhai aelodau o staff oedd yn gyndyn i gael y brechiad, cytunwyd mai trafod brechu, yn hytrach na'i wneud yn orfodol, fyddai'r ffordd ymlaen i staff rheng flaen
- Gofynnodd y Pwyllgor am eglurhad o ran y dadansoddiad o'r 139 aelod o staff nad oedd wedi'u brechu, er mwyn cynnal asesiad risg
- O ran y potensial am drydydd dos atgyfnerthu yn yr Hydref, gofynnodd y Pwyllgor a oedd cynlluniau ar waith i sicrhau y gallai Iechyd Cyhoeddus Cymru weithredu hyn pe bai'n cael ei gadarnhau. Roedd y cynlluniau ar gyfer dull cyfun ar gyfer tymor fflw/Covid-19 i'w hadolygu, a byddai diweddariad pellach yn cael ei ddarparu i'r Pwyllgor
- Canmolodd y Pwyllgor ymrwymiad Iechyd Cyhoeddus Cymru i sicrhau cydbwysedd teg rhwng gwaith a chyfrifoldebau staff unigol i'w teuluoedd a dyletswyddau gofalu ychwanegol yn sgil y pandemig, gan gydnabod ei bod wedi bod yn flwyddyn anodd iawn i lawer o bobl

- Mewn ymateb i gwestiwn ynglŷn â nodi unrhyw dueddiadau o ran cefnogaeth llesiant i staff, nododd NL fod y sylw cychwynnol wedi bod ar y timau Diogelu Iechyd Lleol a'r Ganolfan Gyswllt Genedlaethol, ac ailddechrau dyletswyddau arferol. Cafwyd trafodaethau yng nghyfarfod y Tîm Gweithredol Busnes er mwyn symud y gwaith o adleoli staff yn ôl i'w rolau gwreiddiol yn ei flaen
- Mewn perthynas â'r hyn a ddysgwyd o'r pandemig o ran gweithio o bell, holodd y Pwyllgor sut y byddai'r hyn a ddysgwyd yn cael ei ystyried o ran cynllunio sefydliadol yn y dyfodol. Ychwanegodd HB ei bod wrthi'n cydweithio â Sian Bolton ar y Rhaglen Dysgu Sefydliadol er mwyn paratoi ar gyfer yr Ymchwiliad Cyhoeddus a byddai hyn o gymorth i grisialu 'pytiau' o brofiadau a straeon staff, a fyddai â sawl pwrpas ac a fyddai hefyd yn cefnogi tîm NL i ddatblygu ffyrdd o weithio ar gyfer y dyfodol
- O ran recriwtio yn ystod y pandemig, holodd y Pwyllgor ynglŷn â sut yr aethpwyd i'r afael â heriau a sut y cawsant eu rheoli. Rhoddodd NL wybod i'r Pwyllgor am yr heriau o ran recriwtio o safbwynt gweithio o bell a thynnwyd sylw at y canlynol: -
  - Buddsoddwyd yn LinkedIn, er mwyn darparu dull wedi'i dargedu'n fwy o ran recriwtio arbenigol yn benodol
  - Roedd sefydlu a diwylliant y sefydliad yn bwysig ac roedd sesiynau misol yn cael eu cynnal ar gyfer gweithwyr newydd. Cafwyd adborth cadarnhaol am y sesiynau hyn
  - Roedd adnoddau ar gyfer swyddi tymor penodol a pharhaol wedi rhoi'r gallu i gyflawni'r agenda recriwtio
- O ran yr asesiadau risg personol, nodwyd mai dim ond 50% o staff oedd wedi ymateb a ystyriwyd bod hyn yn rhy isel. Roedd y dangosfwrdd yn darparu'r gallu i adrodd yn fisol ar y mater hwn, fodd bynnag, nododd NL mai dim ond un elfen o'r dull oedd yr asesiad risg a bod y trafodaethau llesiant â'r rheolwyr a'u timau yn elfen bwysig o'r gefnogaeth. Cytunodd NL i gyfleu pryder y Pwyllgor i'r Tîm Gweithredol Busnes o ran y nifer isel sy'n defnyddio'r asesiadau risg personol

#### **Camau gweithredu: NL**

Diolchodd MM i NL a RBW am y diweddariad manwl a ddarparwyd, a **chymerodd** y Pwyllgor **sicrwydd** ar dair elfen y diweddariad ar y gweithlu - Gwydnwch, Llesiant a Recriwtio.

#### **PODC 03.3/2021 Y Gymraeg**

Rhoddodd NL ddiweddariad ar lafar i'r Pwyllgor ar y sefyllfa gyfredol o ran cydymffurfriad y Sefydliad â safonau'r Gymraeg.

Dywedodd NL fod y 12 mis diwethaf wedi bod yn her o ran y gwaith ar yr iaith Gymraeg gan fod adnoddau wedi'u dargyfeirio i'r Ganolfan Gyswllt Genedlaethol fel rhan o'r ymateb i'r pandemig. Recriwtiwyd staff ychwanegol i'r Tîm Cydraddoldeb ac Amrywiaeth a byddai'r tîm yn parhau i ganolbwyntio ar weithio â'r Cyfarwyddiaethau a chyflwyno agenda'r iaith Gymraeg.

Ymunodd SM â'r cyfarfod i roi'r wybodaeth ddiweddaraf i'r Pwyllgor a thynnodd sylw at y sefyllfa gyfredol o ran materion y Gymraeg ac Amrywiaeth gan gyfeirio at y cyflwyniad (cyf 3.3.PODC.21042021), **nododd** y Pwyllgor y canlynol:

- Mae tîm y Gymraeg ac Amrywiaeth a Chynhwysiant yn cydweithio'n agos a bu hyn o gymorth i wella profiad staff a chadw staff â nodweddion gwarchodedig
- Bu Comisiynydd y Gymraeg yn rheoli ymchwiliad
- Amlinellwyd blaenoriaethau'r dyfodol ar gyfer Amrywiaeth a Chynhwysiant a'r Gymraeg ochr yn ochr â'r arolygon staff cyfredol a'r rhai sydd ar y gweill.

Diolchodd y Pwyllgor i'r tîm am y gwaith a gyflawnwyd yn ystod y 12 mis diwethaf, gan nodi blaenoriaethau'r pandemig sy'n gwrthdaro. Awgrymwyd y dylai'r tîm ddarparu diweddariad i'r Pwyllgor yn y dyfodol ynglŷn â'r cam nesaf a beth fyddai uchelgais y sefydliad yn ystod y tair i bum mlynedd nesaf.

Awgrymwyd y gellid cysylltu recriwtio siaradwyr Cymraeg â'r polisi recriwtio, a dylid ystyried lleoliad daearyddol y rolau hyn ac argaeledd/lleoliad siaradwyr Cymraeg yng Nghymru, ac unrhyw hyblygrwydd o ran gweithio o bell a allai gefnogi recriwtio siaradwyr Cymraeg.

Nododd NL fod trafodaethau wedi bod ar y gweill ers nifer o flynyddoedd ar swyddi niwtral o ran lleoliad ac roedd y cyfnod hwn (y pandemig) wedi cyflwyno cyfleoedd i weithredu ar hyn.

Nodwyd mai DE oedd Hyrwyddwr y Gymraeg ar y Bwrdd, a chynigiodd gefnogi'r tîm lle gallai fod o gymorth. Adleisiodd y Pwyllgor y gefnogaeth hon, gan gynnig cefnogaeth i'r agenda hon.

Diolchodd y Pwyllgor i NL a SM am y diweddariad ar lafar, a **nodwyd** y byddai papur ysgrifenedig pellach yn cael ei gyflwyno yng nghyfarfod nesaf y Pwyllgor.

#### **PODC 04/2021 Eitemau i'w Trafod**

#### **PODC 04.1/2021 Cynllunio Gwaith 2021/22**

Cyflwynodd HB Gynllun Gwaith 2021/21 (cyf 4.1.PODC.21042021) a rhoddodd amlinelliad manwl o'r gwaith a gynlluniwyd i'w drafod ar gyfer y cyfarfodydd nesaf.

Gwnaed y sylwadau canlynol gan y Pwyllgor:

- Nodwyd yr angen i gydbwyso adrodd ar gydymffurfiaeth â sicrwydd, ac i sicrhau amser priodol ar yr agendâu ar gyfer yr elfennau strategol
- Pwysigrwydd adolygiadau manwl, a chefnogwyd y syniad o gynllunio adolygiadau manwl am y flwyddyn ar gyfer y Pwyllgor hwn
- Pwysigrwydd cynnwys cynnydd y Strategaeth Pobl ym mhob cyfarfod
- Safonau'r Gymraeg - adroddiad cydymffurfio ar yr adegau priodol
- Adolygiad manwl o Gydraddoldeb ac Amrywiaeth - i gynnwys: dadansoddiad o'r sefyllfa bresennol; y bwlch o ran cyflog rhwng y rhywiau; meincodi data â sefydliadau eraill
- Cynnwys cyfeiriad at dangynrychiolaeth a sut rydym yn mynd i'r afael â hyn

- Pwysigrwydd sicrhau bod yr holl Bwyllgorau'n cydweithio i gyflawni'r amcanion yn y strategaeth pobl.

Atgoffodd HB y Pwyllgor y dylid achub ar y cyfle i adolygu'r Cylch Gorchwyl yn y cyfarfod nesaf sy'n gysylltiedig â ffocws y cynllun gwaith. Hefyd bu ffocws mewn cyfarfodydd blaenorol ar ymgysylltu â staff gyda staff o wahanol gyfarwyddiaethau yn dod i'r cyfarfodydd i wneud sylw ar eu profiadau yn gweithio yn y sefydliad a dylid ystyried hyn hefyd ar gyfer cyfarfodydd yn y dyfodol.

Cytunwyd y byddai'r Pwyllgor yn adolygu ei gylch gorchwyl yn ei gyfarfod ym mis Gorffennaf.

**Camau gweithredu: LB**

#### **PODC 05/2021 Eitemau i'w Cymeradwyo**

##### **PODC 05.1/2021 Diweddariad Polisi**

Darparodd HB ddiweddariad i'r Pwyllgor Datblygu Sefydliadol a Phobl ar Bolisïau (cyf 5.1.PODC.21042021), ac roedd yr adroddiad yn crynhoi statws y polisïau a'r broses gymeradwyo tra roedd y Pwyllgor wedi'i atal dros dro yn ystod 2020/2021.

Nododd NL fod y Polisi Disgyblu wedi'i gadw, ond bod y Polisi Cwynion ac Urddas wedi'i ddisodli.

Dywedodd SW yr hoffai rannu'r papur diweddariad polisi â'r grŵp Ochr Staff/Fforwm Partneriaeth Leol er mwyn rhoi cyfle i gydweithwyr gael sgwrs a chael adborth. Cadarnhawyd bod y papur ar gael i'r cyhoedd a bod trafodaethau wedi'u cynnal ynglŷn â'r newidiadau a wnaed i'r dull, yn enwedig mewn perthynas â pholisïau Cymru Gyfan. Nodwyd meysydd i'w gwella yn cynnwys rhagor o ymgysylltu â'r Fforwm Partneriaeth Leol.

Fe wnaeth y Pwyllgor:

- **Gymryd sicrwydd** o ran y blaenoriaethu a'r cynnydd o ran adolygu polisïau, gweithdrefnau a dogfennau rheoli ysgrifenedig eraill o fewn cylch gwaith y Pwyllgor;
- **Nodi'r** amrywiadau i bolisïau a gweithdrefnau o fewn cylch gwaith y Pwyllgor a wnaed tra bod y Pwyllgor wedi'i atal dros dro (Tabl 1);
- **Cymeradwyo'r** rhestr o bolisïau a gweithdrefnau y cynigir eu bod yn cael eu dileu o'r gofrestr gan nad ydynt bellach yn berthnasol neu eu bod wedi'u disodli gan bolisïau eraill (Tabl 2);
- **Cymeradwyo** estyniad dros dro arfaethedig i bolisïau yn dilyn adolygiad dros dro, hyd at Ebrill 2022 hyd nes y ceir adolygiad llawn o fewn yr amserlen hon (Tabl 3).

#### **PODC 06/2021 Eitemau i'w Nodi**

##### **PODC 06.1/2021 Cofnodion y cyfarfod blaenorol**

Nododd y Pwyllgor y cofnodion o'r cyfarfod a gynhaliwyd ar 27 Chwefror 2020 (cyf 6.1.PODC.21042021).

|                                                                                                                                                                                            |                                   |
|--------------------------------------------------------------------------------------------------------------------------------------------------------------------------------------------|-----------------------------------|
| <b>PODC 06.2/2021 Y Gofrestr Risg Gorfforaethol</b>                                                                                                                                        |                                   |
| Nododd y Pwyllgor y Gofrestr Risg Gorfforaethol (cyf 6.2.PODC.21042021).                                                                                                                   |                                   |
| Hysbyswyd y Pwyllgor fod y Tîm Gweithredol Busnes yn adolygu'r gofrestr unwaith y mis a bod sesiwn Datblygu'r Bwrdd wedi'i threfnu ar gyfer 29 Ebrill 2021 i adolygu'r bensaernïaeth risg. |                                   |
| <b>POCC 07/2021</b>                                                                                                                                                                        | <b>Materion Gweinyddol i Gloi</b> |
| <b>PODC 07.1/2021</b>                                                                                                                                                                      | <b>Unrhyw Fater Arall</b>         |
| Dim.                                                                                                                                                                                       |                                   |
| <b>PODC 07.2/2021</b>                                                                                                                                                                      | <b>Adborth i'r Pwyllgor</b>       |
| Gofynnwyd i'r Pwyllgor ddarparu unrhyw adborth trwy e-bost at HB neu LB.                                                                                                                   |                                   |
| <b>PODC 07.3/2021</b>                                                                                                                                                                      | <b>Dyddiad y Cyfarfod Nesaf</b>   |
| Cynhelir y cyfarfod nesaf ar 8 Gorffennaf 2021.                                                                                                                                            |                                   |

Daeth y cyfarfod i ben am 11.30am